

唐文粹

第二
八
冊

唐文粹卷第六十四

吳興姚鉉纂

碑十六

釋四

碑陰記附總九首

荊州玉泉寺大通禪師碑張說

潤州鶴林寺故徑山大師碑李華

牛頭山第一祖融大師新塔記附劉禹錫

章敬寺百巖禪師碑權德輿

漳州三平大師碑王諷

楊州華林寺大悲禪師碑賈餗

洪州開元寺石門道一禪師塔碑權德輿

無姓和尚碑柳宗元 碑陰記附

荊州玉泉寺大通禪師碑銘并序張說

誤夫總四大者成乎身矣立萬始者主乎心矣身是虛哉卽身見

空始同妙用心非實也觀心若幻乃等真如名數入焉妙本乖言
說出焉真宗隱故如來有意傳要道力持至德萬劫而遙付法印
一念而頓授佛身誰其弘之實大通禪師其人也禪師尊稱大通
諱神秀本姓李陳留尉氏人也心洞九漏懸解先覺身長八尺秀
眉大耳應王伯之象台聖賢之度少爲諸生遊問江表老莊玄旨
書易大義三乘經論四分律儀說通訓詁音參吳晉爛乎如襲孔
翠玲然如振金玉旣而獨鑒潛發多聞旁施逮知天命之年自拔
人間之世企聞蘄州有忍禪師禪門之法肩也自菩提達摩天竺
東來以法傳惠可惠可傳僧璨僧璨傳道信道信傳弘忍繼明重
跡相承五光乃不遠遐阻翻飛謁詣虛受與沃心懸會高悟與真
乘同轍繡指忘識湛見本心住寂滅境行無是處有師而成卽燃
燈佛所無依而說是空王法門服勤六年不捨晝夜大師歎曰東
山之法盡在秀矣命之洗足引之竝坐於是涕辭而去退藏於密
儀鳳中始隸玉泉名在僧錄寺東七里地坦山雄目之曰此正楞

伽孤峯度門蘭若陰松藉草吾將老焉雲從龍風從虎大道出賢
人覩岐陽之地就去成都華陰之山學來如市未云多也後進得
以拂三有超四禪升堂七十味道三千不是過也爾其開法大略
則惠念以息想極力以攝心其入也品均凡聖其到也行無前後
趣定之前萬緣盡閉發慧之後一切皆如特奉楞伽遞爲心要過
此以往未之或知久視年中禪師春秋高矣詔請而來趺坐觀君
肩輿上殿屈萬乘而稽首灑九重而宴居傳聖道者不北面有盛
德者矣臣禮遂推爲兩京法主三帝國師仰佛日之再中慶優曇
之一現然處都邑婉其祕旨每帝王分座后妃臨席鵷鷺四布龍
象三繞時熾炭待礦故對默而心降時診飢投味故告約而義領
一雨溥霑於眾緣萬籟各吹於本分非夫安住無畏應變無方者
孰能至爾乎聖敬日崇朝恩代積當陽初會之所置寺曰度門尉
氏先人之宅置寺曰報恩軾問名鄉表德非疑扁厭諠輦長懷虛
壑累乞還山旣聽中駐久矣衰憊無他患苦魄散神全形遺力謝

神龍二年二月二十八日夜中顧命跌坐汨如化滅禪師武德八年乙酉受具於天宮至是年丙午復終於此寺蓋僧臘八十矣生於隋末百有餘歲未嘗自言故人莫審其數也三界火心四部冰背懷崩梁壞雷動雨泣凡諸寶身生是金口故其喪也如執親焉詔使弔哀侯王歸唱三月二日冊諡大通展飾終之義禮也時厥五日假安闕塞緩及葬之期懷也宸駕臨訣至午橋王公悲送至伊水羽儀陳設至山龕仲秋既望還詔乃下帝諾先許冥遂宿心太常卿鼓吹導引城門郎護監喪葬是日天子出龍門泣金櫬登高停蹕目盡迴輿自伊及江扶道哀候幡花百輦香雲千里維十月哉生魄明卽舊居後岡安神起塔國錢嚴飾賜逾百萬巨鍾是先帝所鑄羣經是後皇所錫金匱御題華幡內造塔寺尊重遠稱標絕初禪師形解東洛相見南荆白霧積晦於禪山素蓮寄生於坐樹則雙林變色泗水逆流至人違代同符異感百日卒哭也在龍華寺設大會八千人度二七入二祥練縞也咸就西明道場數

如前會萬迴菩薩乞施後宮寶衣盈箱珍價敵國親舉寵費侑供
巡香其廣福博因存沒如此日月逾邁榮落相推於戲法子永戀
宗極痛慈舟之遽失恨涌塔之遲開石城之歎也不孤廬山之碑
焉可作竊比夫子貢之論夫子也生於天地不知天地之高厚飲
於江海不知江海之廣深強名無跡以慰其心銘曰

額珠內隱匪指莫效心鏡外塵匪磨莫照海藏安靜風識牽樂不
入度門孰探法要倬哉禪伯獨立天下功收密詣解卻名假詣無
所得解亦都捨月影空如現於悟者無量善眾爲父爲師露清熱
惱光射昏疑冀將住世萬壽無期奈何過隙一朝去之嗟我門人
憂心斷續進憶瞻仰退思付囑盡不離定空非滅覺念茲在茲敢
告無學

潤州鶴林寺故徑山大師碑銘

并序

李華

道行無跡妙極無象謂體性空而本源清淨謂諸見滅而覺照圓
明我天人師示第一義師無可說之法義爲不二之門其定也風

輪駐機其惠也日宮開照其用也春泉利物三者備體誰後誰先
入無量而不動開法華而踴出湛今以有無觀聽而莫測寥今以
遠近思惟而不窮智得皆空爲真實際大悲恆寂遍撫羣迷月入
百川之中佛市千花之上修而證者玄同妙有應而起者有作化
身先大師適來此土化身歟適去他方補處歟不可得而知也自
如來現滅四魔橫恣人天無怙寄命崩崖勝大敵者那羅延身消
大毒者伽陀妙藥拔陷扶墜而生大師大師延陵馬氏諱玄素字
道清崇高紹興於法外徑緒不繫於人間慈母方娠厭患葷肉長
至之日誕彌仁尊生有異祥乳育安靜既胤稽首父母求歸法門
卽日獲請出依精舍如意年中剃度隸江寧長壽寺旣進具已戒
光還照定水澄源鷗王之不受泥塵香象之頓除羈鎖未之比也
身長七尺體無凡骨眉毫際嶮口若方丹目不顧睇聲侔扣玉入
南牛頭山事威大師撞鍾大鳴入海同味迦葉以頭陀第一大師
亦斗數塵勞聞一知十未嘗請益觀法無本觀心不生喻金剛之

最堅比師子之無畏圓月照海高深盡明惠風吹雲宇宙皆淨威
大師摩頂謂曰東南正法待汝興行命於別位開導來學於是騶
虞馴擾表仁之至也眾禽獸果明化之均也接足石繞百千人俱
大師悉以菩薩呼之教習大乘戒妄調伏自性還源無漸而可隨
無頓而可入摩尼照物一切如之吾常默然無法可說或有信願
雙極懇求心要於我渴仰施汝醍醐問禪定耶吾無修問智慧耶
吾無得道惟心證不在言通懷帝釋輪終爲世論自淨而已無求
色聲旣悟者小無微塵大無三界當悟者內珠雖隱猶作來因藥
草萬殊根莖等潤貌和言寡飢至飽歸或有聞尊稱而遷善見色
身而獨得我無爾念道溥慈圓食不問鹹酸口不言寒暑身同池
水飽蚊蚋之飢渴道離人我順眾生之往來貴賤冤親是法平等
故饋甘味而不辭同於糗糒奉上服而不拒齊於弊褐俾夫家有
道侶府無爭人開元中本寺僧法容請至京口潤州刺史韋銑灑
埽鶴林茲焉供養有屠者恣忍積骸如山聞大師尊名來仰真範

忽自感悟懺悔求哀大師受之又白言和尚大悲當應我供大師
納衣跣趺未嘗出戶公侯稽首不爲動搖至是如其懇乞忻然降
詣夫盜隱其罪虎慈其子仁與不仁皆同佛性不生不滅無去無
來今濁流一澄清水立現諸佛所度我亦度之天寶中揚州僧希
玄密請至廣陵便風馳帆白光引棹楚人相慶佛日渡江梁宋齊
魯傾都來會津塞途盈人無立位解衣投施積若邱陵皆委於所
在行無住捨禮部尚書李愔時爲揚州牧齋心跪謁爲眾唱首望
慈月者誰不清涼傳百億明燈照四維上下塵沙之數皆趨佛乘
二州以貪法之心移牒逾月均吾喜捨成汝堅牢無非道場還至
本處天寶十一載十一月十一日中夜坐滅嗚呼菩提位中六十
一夏父母之生八十五年也哀位者可思量否至有浮江而冀望
寺而哭十里花雨四天香雲幡幢蓋網光蔽日月以其月二十一
日四眾等號捧全身建塔于黃鶴山西原像法也州伯邑宰執喪
師之禮率申哀慕江湖震悼曩於寺內移居高松互偃涅槃之夕

椅桐雙枯虎狼哀號聲破山谷人祇慙動天地晦冥及發引登阼
風雨如埽慈烏覆野靈鶴徊翔有情無情德至皆感初達摩祖師
傳法三世智信大師信門人達者融大師居牛頭山得自然智慧
大師就而證之且曰七佛教戒諸三昧門語有差別義無差別羣
生根器各各不同推取上乘攝而歸一涼風既至百實皆成汝能
總持吾亦隨喜曰是無上覺路分爲此宗融大師講法則金蓮冬
敷頓錫而靈泉湧溢東夷西域得神足者赴會聽焉融授巖大師
巖授方大師方授持大師持授威大師凡七世矣真乘妙緣靈祥
嘉應僉具傳錄布於人世門人法鏡吳中上首是也門人法欽徑
山長老是也觀音普門文殊佛性惟二菩薩重光道源門人法勵
法海親奉微言感延霜露繕崇龕座間構軒楹時惟海公求報師
訓廬孔氏之墓起淨明之塔世異人同泣然長慕僧端等蔭旃檀
樹皆得身香菩薩戒弟子故吏部侍郎齊澣故刑部尚書張均故
江東採訪使潤州刺史劉日正故廣州都督梁昇卿故採訪使潤

州刺史徐嶠故採訪使常州刺史劉同昇故潤州刺史韋昭理故
給事中韓賞故御史中丞李丹故涇陽令萬齊融禮部員外郎崔
令欽道流人望莫盛於此弟子嘗聞道於徑山猶樂正子春之於
夫子也洗心瞻仰天漢彌高鏡公門人悟甚深者大理評事楊詣
過去聖賢諸功德藏志之所至無不聞知魯史從告況乎傳信其
文曰

濁金清鏡在爾銷鍊磨之瑩之功至乃見膏漬炷然光明外遍陽
升律應草木皆變啟迪痛瞽惟吾大師息言成教捨法興悲辰極
不動風波自移境由心寂道與人隨杳然玄默湛入無餘性本非
垢云何淨除身心寂寂大拯淪胥內光無盡萬境同如甘露正味
瑠璃妙器遍施大千無同無異度未度者化周緣備道樹忽枯涅
槃時至我無生滅隨世因緣吉祥殿上應化諸天寂寂靈塔滔滔
逝川恆沙劫壞智月常圓

牛頭山第一祖融大師新塔記

劉禹錫

初摩訶迦葉授佛心印得其人而傳之至師子比邱凡二十五葉而達摩得焉東來中華華人奉之爲第一祖又三傳至雙峯信公雙峯廣其道而歧之一爲東山宗能秀寂其後也一爲牛頭宗巖持威鶴林徑山其後也分慈氏之一支爲如來之別子咸有祖稱粲然貫珠大師號法融姓韋氏延陵人少爲儒博極羣書旣而歎曰此仁誼言耳吾志求出世間法遂入句曲依僧晁改逢掖而緇之徙居是山宴坐石室以惠力感通故旱麓泉涌以神功示現故皓雪蓮生巨蛇摧伏羣鹿聽法貞觀中雙峯過江望牛頭頓錫曰此山有道氣宜有得之者乃來果與大師相遇性合神授至于無言同躋智地密付眞印揭立江左名聞九圍學徒百千如水歸海由其門而爲天人師者皆脈分焉顯慶二年報身示滅道在後覺神依故山戒香不絕龕座未飾夫豈不思乎蓋神其冥數必有所待大和三年潤州牧浙江西道觀察使檢校禮部尙書趙郡李公在鎮三閩百爲大備尙理信古儒玄交修始下令禁桑門販佛以

眩人者而于真實相深達焉嘗謂大師像設宜從本教言自我啟
因自我成乃召主吏藉我月入得緡錢二十萬俾秣陵令如符經
營之三月甲子新塔成事嚴而工人盡藝誠達而山神來攸願力
既從眾心歸重造白龍像大會諸天聲香之蘊如見如聞卽相生
敬幽明同感尙書欲傳信于後遠命愚志之夫上士解空而離相
中士著空而嫉有不因相何以視覺不由有何以悟無彼達真諦
而得中道者當知爲而不有賢乎以不修爲無爲也

唐故章敬寺百巖禪師碑銘

并序

權德輿

禪宗長老百巖大師之師曰大寂禪師傳佛語心法始自達摩至
于惠能能化行于南服流于天下大抵以五蘊九識十八界皆空
猶鏡之明也雖萬象畢呈而光性無累心之虛也雖三際不住而
覺觀湛然得於此者卽凡成聖不然則一塵瞥起六入膠固循環
回復於生死之中風濤火輪迷忘不息授受昭台大師得之一言
宗通深入無礙師諱懷暉姓謝氏東晉流寓今爲泉州人孩提秀

發博究書術一旦慨然曰我之祖先今安在耶四肢百體視聽動
使孰使之然耶漼然雨泣誓服緇褐志在楞伽行在曹溪得圓明
清淨之本去妄想因緣之習百八句義照其身心離文字化無
方所於是抵清涼下幽都登徂來入太行所至之邦蒙被法味止
于太行百巖寺門人因以百巖號焉元和三年有詔徵至京師宴
座于章敬寺每歲召入麟德殿講論後以疾固辭十年十二月恬
然示滅其年六十其夏三十五弟子智朗志操等以明年正月起
塔于灊陵原凡一鐙所傳一雨所潤入法界者不可勝書著法師
資傳一編自雞足山大迦葉而下至于能秀論次詳實或問心要
者答曰心本清淨而無境者也非遣境以會心非去垢以取淨神
妙獨立不與物俱能悟斯者不爲習氣生死幻蘊之所累也故薦
紳先生知道入理者多游焉嘗試言之以中庸之自誠而明以盡
萬物之性以大易之寂然不動感而遂通則方袍褰衣其極致一
也嚮使師與孔聖同時其顏生閔損之列歟釋尊在代其大惠綱

明之倫歟至若從師受具之次第宰官大臣之尊信誕生入滅之感異今皆不書某三十年前常聞道於大寂聿來京下時款師言頃因哀傷似獲悟人則知煩惱不逮菩提雖聚散於此生期會歸於彼岸銘曰

西方之教南宗之妙與日竝照百巖得之爲代導師頌若瑠璃結火燔性愛流溺正癡冥奔命卽心是佛卽色是空師之通兮無去無來無縛無解師之化兮揭茲靈塔丹素周帀示塵劫兮

漳州三平大師碑銘

并序

王諷

得菩提一乘嗣達摩正統誌其修證俾人知方則有大師法名義中俗姓楊氏爲高陵人因父仕閩生於福唐縣年十四宋州律師玄用剃髮二十七具戒先修三摩鉢提後修奢摩他禪那大師幻悟法印不汨幻機日損薰結玄超冥觀先依百巖懷暉大師歷奉西堂百丈石碧後依大顛大師實厯初到漳州州有三平山因芟雜住持敞爲招提學人不遠荒服請法者常有三百餘人示以俗

諦勉其如幻解脫示以真空顯非祕密度門虛往實歸皆悅義味
知性無量於無量中以習氣所拘推爲性分知智無異於無異中
以隨生所繫推爲業智以此演教證可知也大師一日疾背疽閉
戶七日不通問泊出疽已潰矣無何門人以母喪聞又閉戶七日
不食飲武宗皇帝簡併佛刹冠帶僧徒大師止於三平深巖至宣
宗皇帝稍復佛法有巡禮僧常肇建等二十人刺史故太子鄭
少師薰倖蔽其事旬歲內寺宇一新因舊額標曰開元於戲知物
不終完成之以碑教知像不盡法約之以表微晦其用而不知其
方本乎跡而不知其常咸通十三年十一月六日宴坐示滅享年
九十二僧臘六十五諷自吏部侍郎以旁累謫守漳浦至止二日
訪之但和容瞪目久而無言徵其意備得行止事實相見無間然
也問曰周易經歷三聖皆合天旨神道注之者以至虛而善應則
以道爲稱以不思而玄覽則以神爲名達理者也經云隱而顯不
言而喻不疾而速不行而至後之通儒有何疑也異日又訪之適

有刑獄因語及師曰孝之至也無所不善有其跡乃匹夫之令節
法之至也莫得而私一其政則國之彝典其於適道適權又如此
言訖頷之不復更言今亡矣夫彊擬諸形容因爲銘曰
觀跡知證語默明焉觀證知教權實形焉體用如一曷以言宣太
素浩然吾師亦然觀其定容見其正性不閱外塵朗然內淨暫圓
則神理通則聖師能得之隨順無競吾之行止師何以知得性之
分識時之機達心大師邈不可追

楊州華林寺大悲禪師碑銘

并序

賈餗

有天地而萬物生焉形氣推遷行識相緣一受其形萬化而未始
有極沙界塵劫驅迷走妄浩乎若汨諸巨海而無垠也俟乎若因
諸闇室而無曉也四蛇六賊攻其內熱燄焦芽寓其質而昧者舉
世猶竊竊然以彊力敏智可大取所欲攘螳臂而戰蝸角其不勝
也則憂悲恐懼日以交馳曾未知夫牽於名而溺於惑者以形質
之相雖天地秋毫細大殊耳其有限一也以壽觀天雖萬齡一瞬